



Ullormut oqaluuserisassani ikaarsaariarnermi tulliuuttumut Siunnersuut Inatsisartut Suliariaasiat § 52 malillugu

Inatsisartut inatsisaat nr. 6 13. maj 1993-immut Naalakkersuisunut ilaasortat akisussaananeratt pillugu ersarilluinnarpoq.

§ 6. Naalakkersuisunut ilaasortaq § 10 naapertorlugu pineqaatissinneqassaaq piaaraluni imaluunniit mianersuaalliorujussuarnermigut Inatsisartut Naalakkersuisullu pillugit Inatsisartut inatsisaat inatsisilluunniit allat malillugit imaluunniit atorfimmi suunera malillugu imminut pisussaaffigisassanngortitaasut malillugit iliunngikkuni.

Imm. 2. Imm. 1-imi aalajangersagaq aamma atorneqartassaaq Naalakkersuisunut ilaasortaq eqqunngitsumik paasinerluutaasinnaasumilluunniit inatsisartunut paasissutissiisimappat imaluunniit inatsisartut oqaluuserisassamik oqaluuserinninneranni paasissutissanik oqaluuserisap inatsisartunit aalajangiiffigineqarnissaanut annertuumik pingaaruteqartunik nipangiussisimappat.

Ineqarnermut Attaveqaasersuutinullu Naalakkersuisoq Inatsisartunit suliakkerneqarpoq aningaasalersueriaatsit taakkulu eqqortumik atuutsinneqarnissaanik suliaqaqqullugu, ilaatigut piginneqatigiilluni inissianut tunngasunut.

Naalakkersuisup nammineq peqquneqarsimanini innersuuppaa, siunnersuutiminili eqqortumik atuutsinneqarnissaanik innersuussaqqarani. Taamaammat Ineqarnermut Attaveqaasersuutinullu Naalakkersuisoq pisussaaffini malinnagu imaluunniit Inatsisartut isummerfissaanut pingaarutilimmik nipangiussisimarpasippoq.

Qulaani pineqartoq tunuliaqutaralugit siunnersuuteqartariaqarpugut ullormut oqaluuserisassani ikaarsaariarnermut tulliuuttumut Inuutissarsiornermut, Ineqarnermut Attaveqaasersuutinullu Naalakkersuisoq peqquteqartumik tatiginnikkunnaarnermik takutitsissalluta isumaqarpugut.